

UCAPAN YAB PERDANA MENTERI,
DATO HUSSEIN ONN, DI UPACARA
PELANCARAN PERAYAAN MENYAMBUT
ABAD KE-15 HIJRAH DI BANGUNAN
PARLIMEN, PAPA HARI RABU,
21HB NOVEMBER, 1979 JAM 9.00 PAGI.

Assalamu 'Alaikum Warahmatullahi Wabarakatuh.

Bismi Ilahir- rahmaa-nirrahim.

Kebawah Duli Yang Maha Mulia,Seri Paduka
Baginda,Yang Di-Pertuan Agong,dan

Duli Yang Maha Mulia,Seri Paduka Baginda,
Raja Permalsuri Agong.

Ampun Tuanku.

Alhamdulillah, syukur patek
kehadrat Allah Subhanahu Wataala, salawat
dan salam ke atas Junjungan Besar Nabi
Muhammad Sallallahu 'alaihi wasallam, kepada
keluarganya dan sahabat-sahabatnya.

2. Patek, bagi pihak Ahli-ahli Jawatan-kuasa Kebangsaan Menyambut Abad Ke 15 Hijrah, dengan segala hormat takzimnya, merafak sembah ucapan setinggi-tinggi terima kasih, serta penghargaan Kebawah Duli Tuanku dan Baginda Raja Permaisuri Agong, di atas kesudian Tuanku dan Raja Permaisuri Agong berangkat mencemar Duli, di majlis ini, dan seterusnya kesudian Tuanku, berkenan merasmikan Pelancaran Perayaan Menyambut Abad Ke 15 Hijrah pagi ini.

3. Patek mohon izin memaklumkan Kebawah Duli Tuanku, bahawa Sekretariat Pertubuhan Negara-Negara Islam di Jeddah,

telah menetapkan bahawa Abad Ke 15 Hijrah bermula dari 1hb Muharram tahun 1401 Hijrah, yang akan jatuh pada 9hb November, tahun 1980 Masehi. Sungguhpun demikian, perayaan bagi menyambut ketibaan Abad baru ini, diadakan dari tahun 1400 Hijrah. Berbagai acara akan diadakan oleh Kerajaan Persekutuan di peringkat Kebangsaan, dan oleh Kerajaan-Kerajaan Negeri di peringkat-peringkat negeri dan daerah, sempena dengan perayaan ini. Perayaan ini bertujuan, bagi membangkitkan kesedaran umat Islam, terhadap kewajipan mereka kepada Allah, serta tanggungjawab mereka terhadap ugama, masyarakat dan bangsanya.

4. Keberangkatan Kebawah Duli Tuanku dan Baginda Raja Permaisuri Agong ke upacara yang bersejarah ini, telah menjadikan majlis Pelancaran ini lebih bermakna dan berkesan lagi. Sesungguhnya ia merupakan satu kemuliaan kepada patek sekelian. Kehadiran Tuanku dan Baginda Raja Permaisuri Agong, telah meningkatkan lagi semangat patek sekelian, serta menjadi satu perangsang yang kuat kepada rakyat jelata, bagi mendorong mereka berusaha dengan lebih bersungguh-sungguh lagi untuk meninggikan syiar Islam, serta meningkatkan kemajuan dan kemakmuran negara seluruhnya.

Ampun Tuanku.

5. Patek mohon izin menunjukkan ucapan patek kepada hadirin sekalian.

Yang Amat Berhormat Datuk Seri Dr. Mahathir Muhammad dan Datin Seri.

Yang Amat Berbahagia.

Yang Di-Pertua Dewan Negara dan Toh Puan.

Yang Berhormat

Speaker Dewan Rakyat dan Puan Sri.

Yang Berhormat Menteri-Menteri dan Timbalan-Timbalan Menteri.

Tuan-tuan Yang Terutama Duta-Duta.

Tuan-tuan dan puan-puan sekalian.

6. Perjuangan pemimpin-pemimpin Islam di awal Abad Hijrah, dan usaha-usaha yang dijalankan selama ini, bagi meninggikan syiar Islam serta meningkatkan kemajuan dan kemakmoran umat Islam, telah meletakkan masyarakat dan negara-negara Islam ke peringkat dan kedudukan yang tinggi pada hari ini. Hasil usaha penyelidikan bijak-pandai Islam, dan bukan Islam, dengan berpandu dan berilhamkan kepada Kitab Suci Al-Quran, telah membawa kejayaan tamaddun dunia yang tinggi.

7. Dengan berkat pertunjuk dan keredzaan Tuhan yang Maha Berkuasa, manusia

telah mencapai banyak kejayaan dalam bidang sains dan teknologi. Ilham dan inspirasi kejayaan ahli-ahli falak Islamlah yang telah mendorong pakar-pakar sains dunia hari ini, membuat penyelidikan dan pengkajian yang lebih mendalam, sehingga berjaya menghantar manusia mendarat di muka bulan. Sesungguhnya, Islamlah yang telah menjadi penggerak terhadap kemajuan ekonomi dan pembangunan yang terdapat di dunia pada hari ini.

8. Sejak Abad pertama Hijrah lagi, umat Islam telah pun terkenal dan giat dalam bidang perniagaan di peringkat antarabangsa. Mereka telah

mengembara dari sebuah negara ke sebuah negara hingga ke negara China, menjalankan perdagangan, disamping memperkembangkan agama Islam.

Di zaman pemerintahan Saiyidina Omar ibni Al-Khattab, satu sistem ekonomi yang kemas dan lengkap, termasuk cara memungut cukai, telah diwujudkan bagi panduan menambahkan pendapatan ekonomi negara.

9. Dalam bidang seni rekabentuk pula, kesan-kesan yang nyata, terdapat dalam bangunan-bangunan besar di kebanyakan negara-negara Eropa dan negara-negara di sekeliling Laut Mediterranean, merupakan warisan dari kepakaran

dan kemahiran umat Islam dalam zaman keagungan
Ugama kita. Konsep pertahanan berkota, yang
digunakan oleh negara-negara Europa dalam abad
pertengahan kurun Masehi, adalah hasil
rekaan pakar ketenteraan Islam yang telah
dibawa kesana.

10. Sumbangan Islam dalam kemajuan
ilmu perubatan dan kedokteran, lahir dari 200
buah buku karangan Imam Al-Razi, yang telah
digunakan sebagai buku rujukan di Universiti-universiti
dunia barat. Ibnu-Sina, yang terkenal sebagai
Raja Doktor, tokoh sains, falsafah dan astronomi,
telah mengarang sebuah buku mengenai pembedahan,

yang menjadi sumber rujukan yang penting dalam perkembangan dan kemajuan bidang ini.

Tuan-tuan dan Puan-puan sekalian.

11. Di-samping kita merenung kembali zaman keagongan Islam dan ketokohan umat Islam, marilah juga kita mengkaji serta mengambil ingatan kelemahan-kelemahan yang telah mengakibatkan kemalapan dan kejatuhan Islam sebagai sebuah kuasa di dunia. Selepas sampai ke kemuncaknya, Islam telah lemah. Umat Islam segera insaf dan sedar. Tuhan yang amat pemurah, telah mengurniakan semula kekuatan dari kekayaan hasil minyak kepada

sebilangan negara-negara Islam. Kebangkitan Islam di hari ini, adalah disebabkan oleh kekukuhan ekonomi negara-negara Islam dari punca sumber minyak. Minyak yang menjadi nadi tenaga, telah memberi sinar dan jiwa baru kepada kebangkitan semangat umat Islam untuk meninggikan syiar agama Allah. Negara-negara maju dan perindustrian di dunia, memandang tinggi serta menghormati negara-negara Islam pada hari ini.

12. Bersyukur kita kehadiran Allah
Subhanahu Wataala, kerana dengan limpah

rahmatNYA, negara kita turut mendapat nikmat kemakmoran dan kemuliaannya. Disamping sumber minyak,yang baru mula diusahakan, dan timah, Tuhan telah juga mengurniakan keatas bumi kita, subur dengan hasil tanaman getah, kelapa sawit dan koko yang diperlukan oleh negara-negara perindustrian. Harga bahan-bahan mentah yang tinggi,telah menambahkan lagi pendapatan negara. Rakyat berbagai kaum, yang telah bersama-sama berusaha membangunkan negara kita ini, turut merasai nikmat kemakmoran dan kebahagiaan ini.

13. Faktor utama yang telah membolehkan kita mencapai kemajuan yang tinggi dan kejayaan yang cemerlang, ialah kerjasama dan persefahaman di kalangan rakyat dari berbagai kaum, keturunan dan berlainan agama. Marilah kita, sempena majlis ini, mengeratkan kerjasama dan persefahaman ini, serta mengukuhkan perpaduan kita supaya segala apa yang telah diperolehi itu, dapat terus dikekalkan dan ditingkatkan. Disamping itu dapatlah kita bersama-sama menyusun langkah dan mengambil tindakan yang lebih berkesan, bagi menghadapi cabaran-cabaran yang lebih besar. dalam tahun-tahun yang akan datang.

14. Saya menggesa seluruh umat Islam, supaya memelihara serta meningkatkan lagi persefahaman dan toleransi beragama, dalam usaha gigih kita menjalankan seruan syiar Islam. Dalam masyarakat berbilang kaum, umat Islam hendaklah mengamalkan sikap jujur serta menghormati hak dan kebebasan lain-lain kaum di negara ini. Kita mestilah sentiasa adil dalam sebarang tindakan kita. Dengan jalan ini, Allah Subhanahu Wataala akan memberkati segala usaha suci kita itu. Jika kita angkuh dan khayal,serta tidak menggunakan kekuatan dan kemakmuran kita itu kepada jalan-jalan

yang diredzai Allah, maka kekuatan dan kemakmuran itu akan memusnahkan diri kita sendiri dan akan menghancurkan masyarakat kita. Allah boleh menurunkan kadzanya.

15. Umat Islam hendaklah juga berwaspada, kerana memang ada gejala-gejala yang tidak sihat, yang cuba hendak memecah-belahkan perpaduan negara kita. Perpecahan di kalangan masyarakat Islam, boleh melemahkan sendi kekuatan kita, dan memberi peluang kepada anasir-anasir jahat memusnahkan negara.

16

Saya suka mengambil peluang ini, untuk mengingatkan rakyat dan penduduk yang menganuti lain-lain ugama dan kepercayaan di-tanahair,supaya sentiasa menghormati Ugama Islam. Mereka mestilah mengambil tahu adat-resam,serta memahami pantang larang dalam ugama Islam, supaya mereka tidak akan melakukan sesuatu yang boleh memperkecil-kecilkan ugama resmi negara. Dengan jalan inumaka dapatlah mereka bersama-sama membantu usaha,mengeratkan persefahaman,serta mengukuhkan perpaduan, di kalangan rakyat dan penduduk berbilang kaum di negara ini.

Tuan-tuan dan Puan-puan sekalian.

17. Satu daripada peristiwa penting yang telah berlaku dalam Abad Ke 14 Hijrah, yang telah melibatkan kita semua, ialah Kemerdekaan Negara pada 5hb. Safar tahun 1377 Hijrah. Di samping kedaulatan dan kebebasan yang diperolehi, kita sungguh berbangga, kerana, dengan usaha dan tekad yang kuat pemimpin-pemimpin kita yang telah lalu, Ugama Islam telah dimaktubkan dalam Perlembagaan Persekutuan, sebagai ugama rasmi negara. Malaysia adalah satu-satu negara di dunia ini, yang telah berjaya meletakkan kedudukan ugama Islam ke taraf

yang paling tinggi, melalui undang-undang.

18. Kemerdekaan negara telah membawa pembangunan yang pesat, dan rakyat telah dapat menikmati keselesaan hidup yang lebih sempurna. Nilai-nilai hidup yang tinggi, di kalangan kebanyakan umat Islam di tanahair kita, jelas membuktikan nikmat kejayaan dan kemajuan yang telah dicapainya.

19. Memang terdapat juga kegelisahan dan kesulitan disebabkan hasrat dan cita-cita tidak tercapai sepenuhnya. Sebagai manusia, kita mempunyai kekurangan dan kelemahan, dan

kadang kala terpaksa menerima kegagalan. Tetapi sebagai umat Islam, kita tidak harus merasa hampa, atau putus asa dan lemah semangat. Sebaliknya, kita hendaklah terus berusaha, berjuang dan merancang apa jua yang boleh mendatangkan faedah dan keuntungan kepada masyarakat Islam seluruhnya.

20. Oleh itu,sempena peristiwa yang bersejarah ini, marilah kita bersama-sama hidupkan kembali semangat yang dipelupuri oleh pemimpin-pemimpin Islam di zaman keagungannya, iaitu semangat yang tidak pernah mengaku kalah,dan semangat yang tidak mahu undur ke belakang

Semangat inilah yang telah meletakkan agama Islam dan umatnya, kemercu kejayaan dan kemajuan yang tinggi.

21. Marilah juga kita sama-sama berdoa kehadrat Allah Subhanahu Wataala, supaya dikurniakan kepada kita semua taufiq dan hidayat, diberi perlindungan dan kekuatan kepada kita semua. serta dikukuhkan iman dan taqwa kita, agar dapatlah kita melaksanakan cita-cita kemajuan dan pembangunan rohaniah dan jasmaniah yang diredhai Allah.

22. Akhirnya, saya mengucapkan berbanyak terima kasih dan setinggi-tinggi penghargaan, kepada Ahli-ahli Jawatankuasa Kebangsaan dan setiap Ahli-ahli Jawatankuasa Kecil, khususnya kepada Datuk Haji Mohamed Nasir, Pengerusi Jawatankuasa Kerja Perayaan, di atas daya usaha serta tenaga yang telah disumbangkan oleh mereka, bagi menjayakan upacara pelancaran ini. Kepada Kerajaan-Kerajaan Negeri, saya juga menyampaikan ucapan terima kasih dan penghargaan Kerajaan Persekutuan, di atas kerjasama dan bantuan. untuk bersama-sama menyertai dalam acara-acara perayaan yang lain, yang akan diadakan di peringkat-peringkat negeri dan daerah-daerah.

Ampun Tuanku,

23. Patek, dengan segala hormat takzimnya, memohon limpah kurnia Kebawah Duli Tuanku, sudi apalah juga kiranya, menyampaikan titah ucapan Tuanku dan seterusnya merasmikan pelancaran perayaan menyambut Abad Ke 15 Hijrah ini.



No. Siri	462
No. Penerimaan	70/79